

LA QUOTIDIANA

FMR Fundaziun Medias Rumantschas, Via da Masans 2, 7000 Cuira, 081 544 89 11, redacziun@fmr.ch

Viva Flurin!

Beinvegni al concert da giubileum

Sonda e dumengia, ils 14 e 15 da matg, envidan il Chor mischedau ed il Chor viril da Laax, il damenchor CHURSÜD ed il Chor d'affons TICO al concert da giubileum «150 onns Flurin Camathias».



Il Chor viril da Laax durant las registrazions per il niev portatun che vegn presentaus a caschun dil concert dils 14 e 15 da matg 2022.

Avon in onn ei vegniu dau l'entschatta allas festivitads en honur da sur Flurin Camathias (1871–1946) che havess saviu festivar ils 6 da mars 2021 siu 150avel anniversari. Sco occurrenza d'avertura era planisau in concert ch'ei denton daventaus l'unfrenda dalla pandemia da corona. Aschia metta il concert che vegn daus sonda, ils 14 da matg, 20.00, e dumengia, ils 15 da matg, 17.00, en baselgia a Laax, igl accent final allas festivitads en honur dil plevon, poet e scribent che ha fatg el decuors da sia veta da quei da 1000 poesias. Biaras da quellas, tenor retschercas ca. 400, ein lu era vegnidass messas en musica da cumponists sco Hans Erni, Duri Sialm, Gion Antoni Derungs, Gion Giusep Derungs, Gion Balzer Casanova ni Gion Andrea Casanova.

Flurin Camathias ed il cant da chors

Ella scartira giubilara «Fontaunas clar resunan – 150 onns Flurin Camathias», ch'ei vegnida presentada igl uost 2021 alla publicitad, scriva la musicologa Laura Decurtins denter auter il suadont: Suenten la gronda fiasta da Tgalavaina a Cuera il 1899 e grazia allas novas lingias dalla Viafier retica flureschan era las fiastas da cant cantunales, il liug per decantar en cuminonza la patria, l'uiara ed ils heroxs grischuns. Cun bia engaschi ed idealissem – per amur dil moviment romontsch – reusseschi alura d'animar ils chors da cantar era canzuns romontschas, veglias e novas. Per la finamira da trer la canzun romontscha ord ils «latschs e las grefflas d'influenzas tudestgontas» lavura era Flurin Camathias cun tutta forza. El scriva e translatescha poesias en ina spertadad sorprendenta e furnescha sin

damonda da cumponists, scolasts, spirituals e dirigents da chor, mo era ord atgna iniziativa per sustener il moviment da cant romontsch sin tuttas varts. Flurin Camathias daventa aschia in dils «mulissiers e gidonters sut cozza vi» ed in dils «pli impurtonts umens» per ils cumponists, ils giuvens chors e las novas ediziuns da canzuns en Surselva.

Premadiziun, premiera ed in portatun

Il Chor mischedau da Laax sut la direzziun da Rest G. Tuor, il Chor viril da Laax ed il damenchor CHURSÜD sut la direzziun da Remo Arpagaus sepresentan al concert cun canzuns enconuscentas, cun truvaglias ed era cun cumposiziuns novas cun text da Flurin Camathias, realisadas aposta pigl onn giubilar.

Per l'emprema gada alla publicitad sepresenta il Chor d'affons TICO (Ti Contas) cun siu dirigent Umberto Camathias. Il chor da project cun affons dalla emprema tochen la quarta classa da Laax e contuorn ei seformaus igl atun 2020 cun la finamira principala d'accumpagnar e promover ils affons sin lu viadi musical.

Medemamein a caschun dil concert vegn presentaus in disc cumpact dubel cun bunamein 50 canzuns, tuttas secapescha cumponidas sin basa da poesias da Flurin Camathias. Quei portatun cun registrazions ord igl archiv da Radiotevisiun Svizra Rumantscha (RTR) e talas realisadas dacuort cun ils chors che coopereschan al concert, ei in dils numerus projects realisaus el rom dallas festivitads «150 onns Flurin Camathias».